



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :

f Tir Yimiyim

ig tiryimiyim@aolima

yt tir yimiyim

TAPAK 3

Ken o bentetba sülenang Asian Games nung shilem agitsü: Sakshi

PM Modi-i US semdangba mapang tezüngzüktep aika agitsü



VOL. XX NO. 238 (ADOK 238) DIMAPUR AMUNGNÜ (SUNDAY) AAMI (JUNE) 11 2023 ₹ 5.00

Manipur azüdokshi bushisüngdangtsü CBI-i SIT tentetogo

New Delhi, Aami/June 10 (Agencies): Manipur nung azüdokshi dak sendakba nung state sorkari benokba ken o trok bushisüngdangtsü asoshi DIG-rank officer ka kübok züngsem ter aliba Special Investigation Team (SIT) ka CBI ajanga tentetogo, ta ktdangsur temi Hokulbarnü ashi.

Union Home Minister Amit Shah-i Manipur semdangba mapang Fir trok CBI ajanga bushisüngdangtsü sangdong. Item rongnung Manipur nung mapa tamajung inyaksü tasa yangluba pongu aser 'general conspiracy' ka lir.

State ktdangsur den amalitep akatsü atema Central Bureau of Investigation (CBI) ajanga Joint Director Ghanshyam Upadhyay yok aser pa meyipa shilangba sülen SIT ya tentet.

Special Crime Branch, Kolkata ajanga ken o tem ya bushisüngdangtsü, ta ktdangsur temi ashi.

"State kübok district balala nung rongrongshirong tulu adoka ki o jen raksatsüba, auyaba aser rakzükraktemba, nok nü/injang-bomb rakzükba,

Taxi driver chirtemi HSLC & HSSLC nung takok anguba tenüngsang agütsü

Kohima, Aami/June 10 (TYO): Kohima district nung taxi driver chirtem parnok 20-i Nagaland Board of School Education kübok HSLC aser HSSLC tatidang nung First Division anguba asoshi All Nagaland Taxi Association (ANTA) Headquarter Kohima ajanga Honibarnü tenüngsang agütsüba sentong ka ayongzüka liasü.

Parnok rongnung HSLC tatidang nung pass asür nisung 11 aser HSSLC tatidang nung pass asür nisung 9 liasü.

Iba sentong nung ANTA Hq Kohima tir Dziesevituo Solo-i takok anguba kaketshir dang pelaba lemsatepdang tsürabor aser ANTA züngsem temi taxi driver ama meranga inyakba atema tenüngsang agütsü liasü.

Pai lanurtem dang medemer tamajung meyimtetsü ajungshi aser takum nung takok angutsü asoshi "Mah" ta ashitsü angazüksü ashi.

"Shisaliok ya nü meyong aser nüdak nungi shingai merakzüktetsü," ta pai ashi aser ANTA züngsemtem dang taxi anishiba atema aka mebilettsüla, kechiaser meranga aser ochishia inyakba ajanga asenok takum alir, ta pai ashi.

ANTA Hq Kohima general secretary Meyieho Hibo-i ashiba

nisung takum samaba dak sendakba nung Manipur state ajanga yokba ken o trok tanü CBI ajanga züluokogo," ta iba agency indang odongtari ashi.

Ken o kanga junga bushisüngdangtsü aser tensa tamajung atalokba nung tasa tamajung aliba kaktetsü aoshi SIT tentetogo, ta pai ashi.

Hokulbarnü telungpur telok ka security personnel ama süoshi agir Hokulbarnü Imphal West district kübok yimtsüng ka nung combing operation tenüng nung kimai jazükba sülen nisung asem tepset aser ana yiruja liasü, ta ktdangsur temi ashi.

Iba lendong ya Kangpokpi aser Imphal West district arütsü nung aliba Khoken yimtsüng nung atalok.

Telungpurtem ya Meitei kin nungi alitsü südi ta amanger, ta ktdangsur temi ashi.

Prangbong ola angashiba sülen yimtsüng anasa patrolling senzüa aliba security forces tem arua liasü.

Telungpurtem jena ao saka iba mapang yimdaklir nisung asem dak injang agi khar liasü. Par asem tasümayang ya Assam Rifles temi nguteta liasü.

agi, tanü-asüng lima nung ajaklen tetoktepba agi sünga lir, saka mapa inyaksü atema aka mebilettsüla.

Pai kaketshirtem dang tsürabor temi parok nem education tajung agütsü mechi tim atemba kodanga mamadoktsü ayongzüka liasü.

Takok anguba kaketshir den tepela lemsatepba mapang tarutsü jenjang tajung südakjang, ta pai moaja liasü.

Hibo-i tsürabortem dang pei chirtem takok anguba nung temolung lemer züpazülema melie tarutsü nunga parnok lenmang shidak nung anitetsü tsürabortem ayongzüka liasü.

ANTA Action Committee convenor Viraseo Chakruno, ANTA tir Solo kinungtsü Alike Shohe aser ANTA züngsem Sumi Singh nungeria iba sentong nung kaketshir nem tenüngsang agütsü jembia aser ANTA Hq Kohima ktdangsur temi mapa tajung inyakba asoshi pelaba lemsatepa liasü.

Iba sentong nung menden ANTA Hq Kohima vice president Elho Kin liasü, Pastor, Bethel Baptist Church, Avilie Punyu-i sarasadem, Vetholu Rhakho-i temeja ken ka ajanga lokti ayongzüker aser ANTA Hq Kohima treasurer, Victor Rutsa-i melepzüng o jembia liasü.

Kidang yariteper temeden asoshi temzüng tesashi nüngdaker

Kohima, Aami/June 10 (TYO): Kidang yariteper nem taa peria magütsüba aser merenshia amshiba indang khuret lemsatepdang, parnok temeden yaritsü asoshi temzüng tesashi nüngdaker, ta Nagaland State Women Commission züngsem Kekhrienuo Meyase-i ashi.

Linük aser talisa Nagaland nung kidang yariteper (domestic worker) aser unorganised sector nung inyaker asoshi temzüng tesashi maliba ajanga mapa inyakba tesem nung tim masüba yimya amshiba densema züngdangtsü makokba timtem ajurur, ta Meyase-i Savio Kg School, Kohima nung Honibarnü Domestic Workers' Week (DWW) tenzüker sentong nung ashi.

DWW ya Ferrando Domestic Workers' Alliance (FDWA) ajanga "Recognise decent work

for Domestic Workers for their social protection and sustainable development" omen nung ajemdaker ayongzüker.

Iba sentong nung Meyase-i ashiba agi, kidang yariteper, yimntong nung yokya-yokchir tetsürtem (women street vendors) aser ano unorganized sectors asoshi tebilemttsü ya Commission indang ken o tongtipa lir.

"Par temeden wazüka ayutsüla, kechiaser parnok lendong timtem balala ajurutsü kanga melar," ta lai ashi aser parnok taa tajungba aser mapa inyakba mapang latetsü temeden atema tashi agütsütsü asoshi NSCW ajanga state sorkar teyari bushitsü, ta ashi.

Mapa inyakba tesemtem nung 'sexual harassment' anema Commission ajanga awareness campaign ayongzüksü, ta lai ashi.

Lai Street Vendors Act nung sorkar temolung agütsütsü ayongzüker, koba 2016 küm agizük saka Nagaland nung tang tashi mapa kuma meinyaker.

Lai FDWA dang kidang yariteper nem mapa inyaksü angazükdaktsütsü ajungshi aser ibaji ajanga parnok taa timba akumtsü aser kibur-ia akumtsübotsü, ta ashi.

Nagaland State Social Welfare Board indang Supervisor, Juliana Medom-i kidang yariteper ajungshidang parnok temeden metetsü aser temolung alemtsü ashi.

"Nenoki nenok aser nenok mapa inyakba tesem akumtsübotsüla, kechiaser nünok mapa ya jenjang tulu lir, kechiaser nenoki ochishia aser meranga inyakba nung aazüker aser state indang rongsenketzüng nunga yarir," ta Medom-i ashi.

(Maneni tapak 2 nung...)

Biren Singh-i Manipur raksatsüba anendakjang: K. Therie

Dimapur, Aami/June 10 (TYO): Hills MLA tem yimjung asoshi sentong balala bener tejakleni aruba pela agizüker. Shidakba nunga yimjung tesunep bener arunera, Chief Minister N. Biren Singh-i Manipur raksatsüba anendaktsütsüla, ta taoba NPCC tir K. Therie-i sangdong ka nung ashi.

Tai kecha mali sernung nisung 100 jungnüa takum samaba aser civilian meyirijang aika tim atemba ya pa tai lir. Pai Kuki nung maziüktet. Pai tejangja sensotem maziüktet. Pa maneni inyakba ajanga tensa ang tamajungba akumtsü. Mesüra nenok meimchir asoshi mapa tamajung inyakba party ka lir, ta Therie-i ashi.

Kuki nung asoshi Administration balaka renemtsüka asünungbo Hill areas nung mokongshitsüla, ta takhangba bener Union Home Minister Amit Shah ajuruba tetetzü administration balaka kumtetba nung tai aputsü mali ta sayuba lir, koba ajanga Manipur state nung telemsa adoka aliba sayur.

Kechiaser Constitution nung UT mesüra state medeni administration temeja malitsü ta shia lir.

Delegates temi aginüba nung Meitei nungeri tribal jenjang meshiba atemabo shia mali. Tetetzü Amit Shah ajurur temi Meitei nung nem Scheduled Tribe jenjang agütsütsü agizükba lir. Aser tasembuba nung, Manipur nung aliba Naga nungertem ya tang yimjung ken o tejembidak

aliba nung tesem danga kati anir mora, Manipur state telungzüker nung alitsü, ta pai ashi.

Ni asadangtetba ya tai süra metongshijang.

Manipur nüburtem tim atemba ya asenok tim atemba lir. Asenoki süiki ia bilemttsür. Asenoki yimjung arudaktsüner. Lenirtem aser teshisadanger tem külemi mener metokmeperi metongshitsü imlar. Nisung shia tejangraba wazüka yuang. Meitei nungera süang, Kuki nungera süang mesüra Naga nungera süang, ajak ya pilatsü makokba kidangertem lir, aser aji ochi lir. Asen temenden senmang mesüra tarutsü atema mesüaka kati ka asoshi tajung inyaksütsü asen mapa lir, ta Therie-i ashi.

(Maneni tapak 3 nung...)

Kaketshir 12 nem N.I. Jamir Academic Excellence Award agütsü

Dimapur, Aami/June 10 (TYO): Ao kin nungi HSLC Examination 2023 nung top 20 jenjang tongtetba kaketshir 12 nem N.I. Jamir Academic Excellence Award agütsüba sentong ka Molu Ki, Kohima nung June 10, 2023 nü ayongzüka liasü.

Iba sentong nung tongti o jembir Advisor, Transport, Technical Education, Government of Nagaland, Temjenmenba liasü.

Iba sempet agütsüba sentong nung jembidang Temjenmenba-i HSLC tatidang nung tematiba jenjang nung takok angur nem tenüngsang agütsü aser maneni meranga inyaka temaba jenjang atongtsü ajungshia liasü.

Pai kaketshirtem dang N.I. Jamir takum aser pai takok balala anguba ajanga ajungmesotsü ajungshi, shiba timtem balala ajuruaka srare nung sorkar office tematuba tongteta liasü.

Pai maneni kaketshir dang takok anguba mapanga meranga inyaksü aser ajemalutsü aser

mesamadaktsü ayuba atema pelaba lemsatepa liasü.

N.I. Jamir Academic Excellence Award ya Kohima Ongpangkong Telongjem ajanga tentetba lir aser parnoki 2007 küm nungi tenzüka HSLC tatidang nung tematiba jenjang yongteter nem konang tetushi agütsü arur aser tanü tashinung iba sempet kaketshir 106 nem agütsüogo.

Iba award nungya takok anguba kulizüng ka den senpet sen 10,000 dena lir.

Takum iba sempet angurtem yamai alitsü:

* Mulungsula Changkiri	: 10th Rank
* Imnaakum Imsong	: 11th Rank
* Jungshinungla	: 11th Rank
* Rongchensenla	: 12th Rank
* Wangshizenla	: 13th Rank
* Imtitongzuk	: 15th Rank
* Maongkala M. Imchen	: 16th Rank
* Sungtiben Kichu	: 17th Rank
* Molungben Longkumer	: 17th Rank
* Rongsennungla Longchar	: 17th Rank
* Imnasenla M. Longkumer	: 18th Rank
* Temsumenla Jamir	: 20th Rank.

Kohima nung 'All India K-Pop Contest 2023' regional round agiogo



Kohima, Aami/June 10 (TYO): India aser Korea na tsüingda tesendaktep yanglur küm 50 ajungba nüngdem nung Korean Cultural Centre India (KCCI) aser LG Electronics na senteper All India KPOP Contest 2023 ayongzüka agidar.

Iba sentong kübok Honibarnü Kohima nung Heritage, Old DC Bungalow, Raj Bhawan nung regional round agiogo, kong team 10-i ken atenba aser tsüingsangba nung shilem agia liasü.

Iba tetoktepbä ya India ajungba nung Ita trok tashi agitsü, kong round pezü; online, regional, semi-finale aser grand finale alitsü. online qualifiers round ya April 26 nungi May 13 tashi agiogo, kong India ajungba nungi team 11,071-i shilem agia liasü, koba 2011 küm tenzüka sülen taküm telok timbai shilem agiba liasü. Online preliminaries ajanga shimertem regional round nung shilem agitsü, koba

yimti 11 nung ayongzüka agitsü. Director of Korean Cultural Centre India Hwang Il-Yong-i ashiba agi, "K-pop ya Korean pop song dang masü saka alima nung aliba nüburttem sendaktepsü atema lenmang ka kümogo. India nunga K-pop meimba sempet aketba lanurtem aika lir. Korea aser India na tesendaktep yanglur küm 50 ajungba nüngdem nung onoki Korea aser K-pop meimba India nung lanurtem nem parnok sempet sayatsü aser jangradema shilem agia parnok nükjidong maneni bushitsü atema sabang ka lapoktsünüa liasü. Onoki lapoktsüba sabang aser K-Pop ajanga shilem agirtem aser nüburttemi tangatetba aser temeim sadem sadema lemsatepsü imlar."

Kolkata aser Itanagar nung tetoktepbä ayongzüka agiba sülen Kohima-i aruogo aser iba sülen Delhi, Hyderabad, Bhopal, Bengaluru, Guwahati,

Chennai, Mumbai aser Lucknow nung agitsü.

Regional preliminaries nung vocal aser dance category nung takokertem semi-finals nung shilem agitsü. Semifinal nung takoker 10 (5 vocal, 5 dance) nem K-Pop Academy" program ajanga mongintemi kentenba aser tsüingsang nung training agütsütsü. Semi-finals nung takok angurtem final-i aitsü aser final nung takok angur nem Korea semdangtsü asoshi maongka agütsütsü. Semifinal aser final ya Delhi nung agitsü. Final round ya G 20 Summit benjungtsü atema sobaliba sentong ka ama agitsü, kong Korea nungi nüngtugu K-Pop artist band temi shilem agitsü.

All-India K-Pop Contest ya 2011 küm nungi agia arudar aser taküm ya 13buba lir. COVID-19 wara poktetba ajanga 2021 aser 2022 küm iba tetoktepbä ya online ajanga dang agi, saka taküingo offline benjung ka ama agidar.

NSCN/GPRN (Niki)-i züingsem ka mapa nungi anentsü

Dimapur, Aami/June 10 (TYO): NSCN/GPRN-i sangdong ka ajanga Secretary, Kilo Affairs office-i Sumi Region kübok Akuluto jila nungi asür Niheto Chishi'er jabaso Tohito Chishi, Khapur medical

ground nung ajemdaker mapa nungi anentsüba sangdongogo. Kilo Affairs-i sangdongba discharge order ya osang agütsüba mapang nungi benoka inyaksangshitsü, ta kasa sangdong ajanga metetdaksü.

Abiogenesis-i 'Romancing The Hills' ken sayaogo



Dimapur, Aami/June 10 (TYO): Nagaland nungi nüngtugu kentenba telok Abiogenesis-i parnok indang ken tasenba; "Romancing The Hills" June 8 nü sayaogo.

Iba ken ya Spotify, Apple Music, Amazon Music, Deezer amala International major digital sabangtem nung stream asütsü aser alitsü atema angutsü.

Romancing The Hills ya instrumental piece ka lir aser

iba ya Nagaland nung lisa ajungba aser kecha agia minprong masüba tenemtem tebur ajung indang lir. Iba ken ya Naga nung tetsütebou temi aten kensü nung mejemogo, kong front lady Arenla-i Bamhum atemer, Moa-i guitar & Strings, Aso-i drums aser Meren-i bass atemer.

Iba ken ya <https://songwhip.com/abiogenesis/romancing-the-hills> ajanga alia angatetsü.

Kidang yariteper temeden asoshi temzüng ...

(TAPAK 1 NUNGI...)

"Nenoki nenok aser nenok mapa inyakba tesem akumtsübotsüla, kechiaser nünok mapa ya jenjang tulu lir, kechiaser nenoki ochishia aser meranga inyakba nung aazüker aser state indang rongsenketzüng nunga yarir," ta Medom-i ashi.

FDWA Kohima indang coordinator ya Sister Rincy Kamei lir, shiba Guwahati nung aliba Centre for Development Initiatives (CDI) kübok alliance lir, koba Missionary Sisters of Mary help of Christians (MSMHC) atema coordinating centre lir.

Ibai NGO tentet ka lir aser parnoki Northeast nung aliba state trok nung tajemzüka jenjang nung aliba nüburttem, talisa tetsür, tanur atema inyaker.

Hopta tepiyong akatsü aliba sentong nung MSMHC indang social work wings 12 ajanga region nung advocacy sentong balala ayongzüksü.

"Asen kidang yariteper timba azüingtsü aser zülutsü memetet aser tepetzük jenjang aser backward tesemtem nungi lir aser aina migrants tem lir. Taa junga magütsüba aser 'working condition' majungba aser mapa inyaksü mapang telatet baliba, tiazü nung tai tongloktsüba, mapa inyakba tesem nung merenshiba aser 'sexual harassment' ya tebilemstü tulutem lir," ta lai ashi.

State, national aser international jenjang nung parnok temeden angutsü asoshi inyaksü FDWA nükjidong lir, ta lai ashi. Tang Kohima yimti kisüng

nunga kidang yariteper 927 lir aser ki mapa inyakba nung tanur 209 FDWA ajanga jangjatetogo. Nisung ya timba alitsü akok, saka parnoki tenüng züluokdaksütsü memolunger, ta lai ashi.

T. S. Joysee-i FDWA nung registered domestic worker ka ama lai ajangshibatem lemsatapa liasü.

Iba sentong nung Agnes Kezo menden liasü aser Parish Priest of SFS Church Kohima Rev Fr Mhabemo Mathew-i sarasadema sentong tenzüker aser Nuzovolu Nienu-i temaja ken ka aten.

Maneni Field Animator Aneibu Theünuo-i melepzüing o jembi aser Catechist SFS Church Kohima Francis Petekhrizeo-i sentong tembanga sarasadema liasü.

Sovima Village Council-i pelaba lemsatap



Dimapur, Aami/June 10 (TYO): Sovima Village Council-i sangdong ka ajanga, Government Primary School, Vitho Khel, Sovima nung tekübokba jenjang nung aliba kaketshirtem nem chiyongtsü aser stationery tem agütsüba atema Little Star Higher Secondary School, Dimapur dang kanga pelaba lemsatapogo.

Little Star Higher Secondary School, Dimapur-i ayongzüka hopta tepeyong tenla aser teyari agütsüba sentong nung kaketshirtemi külem kaketshirtem den parnok akaba lemsatapba mapa onoka densemba atema kanga pelar ta kasa sangdong ajanga metetdaksü.

Nenok inyakyim ajanga jakabo ka ita alirtem masü aser

pei ket nungi kechi ali aji tekübokba jenjang nung alirtem den lemsatepsü kanga tongtibang ta angazükogo.

Nenok mapa tajung ya nenok school nung ama ozü yimsüing nunga ajak asoshi teyari südakjang. Tulusang Tsüngremi tenla agütsürtem ajak molamoshia moajang, ta kasa sangdong ajanga metetdaksü.

Peren nung "First 1000 Days" sentong tenzükerogo



Dimapur, Aami/June 10 (TYO): Peren nung "First 1000 Days" sentong June 9 nü Deputy Commissioner Vineet Kumar, IAS-i CMO Conference Hall Peren nung tenzüksüogo.

Sentong nung o jembiba mapang DC Vineet Kumar-i medical department, allied departments aser stakeholder ajak dang Child Health aser Antenatal Care, tanur kinü asüadang lenla ajak nung renloka aotsü atema complete nutrition aser tanurtem vaccine agitsü koda tongtibang iba indang osang takok tashi prokshitsü atema mepeshia liasü. Paisa, nüburttem dang takzü takbong balala dak tamang makatsü ayongzüka liasü.

Sentong nung Dr. Limatulla Ao, CMO Peren-i lokti pela agizükba o jembi.

Sentong nungsa Dr. Spongmenla Walling, DPO RMNCHA+N-i, tanur ka asoshi mezüngbuba anogo 1000 ya koda tongtibang, mezüngbuba anogo 1000 tsüingda kechi jenjang agitsüla, state nung Antenatal Care

coverage (ANC) jenjang, 'first 1000 days' atema sorkar scheme tem aser antenatal care koda tongtibang iba indang powerpoint presentation ka agüja liasü.

Kasa mapang nung Dr. Imtiakum, SMO Jalukie CHC-i, mozükidang ANC delivery jenjang indang, Dr. Dennis H Chingpen, Obs & Gynae, DH Peren-i PMSMA & point of care testing in ANC indang aser Dr. Chapkelilakbo Dailam-i tanurtem vaccine agitsü koda tongtibang iba indang lemsatapa liasü.

Maneni I. Tsungrosionla, DWO Social Welfare, Peren-i, Pradhan Mantri Matru Vantana Yojna (PMMVY) Scheme aser mezüngbuba anogo 1000 tsüingda nutritional support indang lemsatapa liasü.

Iba sentong ya Temsunenla Kipgen, BPM, Ahthibung block lenisüba nung agi aser S.Y Sangram, UDA-i Tsüngrem temaotsü meshizüka sarasadema liasü. Sentong nungsa Dr. Lanuakum, Dy. CMO-i tepela anküp o jembi.



New Delhi, June 10, 2023: Honibarnü NCP Foundation Day anogomong sentong nung party Tir, Sharad Pawar den party lenirtem- Pratul Patel aser Chhagan Bhujbal nunger adenba noksa nung angur.

PM Modi-i US semdangba mapang tezüngzüktep aika agitsü

New Delhi, Aami/June 10 (Agencies): Ato kilonser Narendra Modi-i June 21 nungi United States semdangba mapang nung tezüngzüktep aika agitsü imlar, ta ketdangsertemi metetdaksü.

US Tir Joe Biden aser First Lady, Jill Biden nati jaokba nung ajemdaker Modi-i June 21 nungi June 24 tashi US semdangtsü.

China-i Indo-Pacific region nung kanga ambangyima inyakba mapang India aser America na tsüngda tesendaktep tajungba akümba ya kanga tongtibang, ta aikati bilemer.

2014 küm Modi Ato kilonser akümba sülen India-US tsüngda tesendaktep kanga junga kümogo. 2014 küm nungi tenzüka US nungbo tang agi Tir tasembuba inyaker. Barack Obama aser Donald Trump na US Tir asüba mapang nunga Modi-i lenir ana denji

tesendaktep tajung ayu aser tang Joe Biden den-a tesendaktep kanga junga lir.

US semdangba mapang nung Modi-i US Congress nung jembitsü aser tang agi tanabenbuba pai iba sentong nung jembitsü.

Taoba ita Japan nung G7 senden aliba mapang nunga Modi aser US Tir Biden na ajurua liasü.

US-India Business Council (USIBC) Tir, Atul Keshap-i, India aser US na senden amenbaji alima nung democracy linük tulutiba ana senden amenba lir, ta metetdaksü.

Tang India aser US tsüngda shishilembabaji dollar sen billion 190 dak tema lir saka linük anaprongla nungi lenirtemi linük ana tsüngda küm shia shishilembabaji dollar sen billion 500 tashi akümsü nükjidong nung inyaker.

India aser US tsüngda defence, e-commerce, supply chain manufacturing, digital economy, FinTech, energy & aerospace nunga tesendaktep junga lir.

Modi-i US semdangba mapang nung India nunger raraba tayimtsü nung amshiba American jet engines India nung yanglutsü atema General Electric (GE) aser Hindustan Aeronautics tsüngda tezüngzüktep agitsü imlar, aser iba ya atangji atalokra 'Make in India' jenjang kanga ajungkettsü. Iba dak alia India-i sen crore 22,000 jenjang MQ-9 B armed drones 30 alizüktsü atema tezüngzüktep agitsü.

June 23 nü Modi-i Washington nung India nunger den ajurutsü aser iba sentong nungji Modi-i India ainba nung bendanglen alir sensotemi shilem agiba indang jembitsü.

National Conference-i opposition party tem teloktep nung madentsü

Rajouri, June 10 (Agencies): Honibarnü National Conference (NC) tatong Tir, Omar Abdullah-i sangküm Lok Sabha election nung BJP anema tokteptsü atema longjemba opposition teloktep nung par party-ibo madentsüsa olen ka jembio.

Taoba mapang Jammu & Kashmir chief minister, Omar Abdullah-i, Jammu & Kashmir nung Arrla 370 agienba mapang nung item opposition party aikati ola madoki liasü, ta ashi.

Tasüngdangba ka langzüdang pai, Jammu & Kashmir nung assembly election agitsü mesangdong tashibo party tem lokteptsü atema jembitsüji tera kerar, ta ashi.

Artsülen aliba Rajouri district nung osangbenertem den jembidang pai, "Jammu & Kashmir adener onoki tanga atema kechi inyaktsü? Onok Lok Sabha menden 5 dang lir, anungji iba jagi kechi sütettsü? Item menden nung onoki BJP anema raratsüla, ajisiüka J&K adener tangalen onoki kechi sütettsü," ta metetdaksü.

2024 küm Lok Sabha election nung BJP anema National Conference-i tanga party tem den longjemtsü asü?, ta asüngdangba langzüdang pai, "Iba ama teloktepi ajanga party aser Jammu & Kashmir-i

tajangzük angutsüsa ni kecha majiteter. Parnoki onok nungdakba mapang nungbo onok bushir, ta ni aiben jembia aruogo. Kejriwal (Delhi Chief Minister Arvind) timtem nung aliba mapang pai onok teyari bushir, saka 2019 küm onok ashioktsüba mapang (Arrla 370 agienba) nungbo item ama lenirtem kong liasü?" ta asüngdang.

Iba mapang nung tu Jammu & Kashmir nungertem atema shirnoki nokdak, ta pai ashi.

"Tanü linük temzüng aser democracy kümzüktsü atema ola adokertem tu yangi (Jammu & Kashmir) democracy tepsetba mapang nungbo kong liasü. Parnoki ibaji anema ola madok, aser iba tetezü parnoki (Parliament nung) pusema liasü," ta paisa metetdaksü.

Opposition party pezü-DMK aser Mamata Banerjee-i aniba TMC den Left party anati dang mapang ajak nung Jammu & Kashmir pusemer, ta pai ashi.

J&K nung assembly election dak sendakba nung pai, "Election Commissioner-i onok dang, home ministry nungi security tensa osang anguba sülen election agitsü atema anogotem sangdongtsü ta shiogo. Tang tashi parnoki iba osangji mangu asütsüa akok; iba ya ni mangateter," ta metetdaksü.

Yimsü tenüng nung yimyim ayimba ajanga kecha masütsü: Gehlot

New Delhi, June 10 (Agencies): Taküm küm tatembanglen Rajasthan nung Assembly elections agitsü lia Congress lenir tain aser Rajasthan chief minister, Ashok Gehlot-i, BJP-i Karnataka assembly election mapang yimsü tenüng nung ajemdaker nüboyimba ajanga takok mangu, yamaji taküm parnoki maneni takok mangutsü, ta ashi.

Interview ka nung jembidang Ashok Gehlot-i, "Ato kilonser Modi süaka mesüra Amit Shah süaka parnoki yimsü nung ajemdaker yimyim ayimer. Tangbo ibaji ajanga kecha

masütsü. Karnataka nunga parnoki 'Bajrang Bali' tetshia liasü saka tamakok angu. Parnoki kanga aibelen ainyakogo. Ni election commission dang election nüboyimba nung Ato kilonser Modi nem shilem tagidaksü ta takhangba agütsüogo. Item ama ya ozüng alema lir," ta ashi.

Pai Congress party pusemertem dang, BJP-i yimsü dak sendakba nung tashishitsü otem jembitsü, saka parnoki Karnataka nung tamakok anguba ama Rajasthan nunga takok mangutsü, ta ashi.

Ashok Gehlot-i tang tashi

nung pai aniba sorkari inyaktetba mapatem metetdaksü aser par party-i terenlok mapatem inyakba ajanga taruba election nunga takok angutsü, ta ashi.

"Tesüba küm pongu onoki yimsüsüba nung ajemdaker onoki takok angutsü ta ni bilemer. Onoki infrastructure terenlok, shisaliok, health, tzü aser jalatem jenjang ajungkettsütsü atema inyakogo. Rajasthan nung onoki kilometer lakh 1 gari lenmang yanglutsü aser iba nungjagi kilometer 56,000 bo renemogo," ta metetdaksü.



June 10, 2023 nü Kolkata nung Bharat Chamber of Commerce- i ayongzükba sentong ka nung Chief Economic Advisor, V Anantha Nageswaran-i jembidang tangokba noksa nung angur.

SALE NOTICE FOR SALE OF IMMOVABLE PROPERTIES
APPENDIX- IV-A [See proviso to Rule 6 (2) & 8 (6)]

Securitisation and Reconstruction of Financial Assets and Enforcement of Security Interest Act, 2002 aser Security Interest (Enforcement) Rules, 2002 kubok Rule 6 (2) & 8 (6) nung ajemdaker E-Auction ajanga kiojen ayoktsü notice.
 Public aser talisa sen apur (tem) aser Guarantor (tem) dang ya sangdonger, Secured Creditor, **Bank of Baroda, Circular Road Branch, Dimapur, Nagaland** dang mortgaged/ charged asüba kiojen **Bank of Baroda, Circular Road Branch, Dimapur, Nagaland**, Secured Creditor nung Authorised Officer-i agiadokogo aser tsünglanglen shia aliba sentsüh alangzüktsü atema kiojenji "Kong koma ali", "Koma lidir yamaji" aser "Yangji aliba ajak" asütsü. Sen apur/tem / Guarantor/tem / Secured Asset/s / Sentsüh / Reserve Price / e-Auction anogo aser mapang, EMD aser Bid Increase Amount indang osang tejangja tsünglanglen shia lir:-

Status of Possession: Physical
 Property Inspection anogo aser mapang: **13.07.2023 & 10:30 AM nungi 4:00 PM**
 Sentsüh ajak senteper: **Rs.1,11,10,006.32 (Rupees One Crore Eleven Lakhs Ten Thousand Six and Paise Thirty Two Only), 29.12.2021** anogo tashi nung aser iba denji sen tetemlok aser tanga charges.

Sl. No.	Name & address of Borrower/s / Gurantor	Kiojen osang tejangja	Date & Time of E-Auction	Reserve Price, EMD amount, Bid Increase Amount.
1	1. MR. CHINNY MAGH (BORROWER) House No.208, Industrial Village, Razhuphe, Dimapur, Nagaland State- 797112. 2. MRS. NAOMI MAGH (CO-BORROWER) House No.208, Industrial Village, Razhuphe, Dimapur, Nagaland State- 797112. 3. MR. SENILO MAGH (GUARANTOR) S/o Chinny Magh, H/No. 208, Industrial Village, Dimapur- 797112, Nagaland.	Padumpukhuri, Dimapur nung Patta No.1202, Dag No.295/1671 agi ayimjemba aser Shri. Chinny Magh, S/o Late Ashiwa Magh tenüng nung aliba ali tasazük 0B-1K-18L aser building. Bounded by:- Bounded by:- North tsütsüalen: Lanu Ao kimong, South tsütsülen: Approach Road, East tsütsülen: N. Konyak kimong aser West tsütsülen: Bohovi Awomi kimong.	19.07.2023 1:00 pm to 3:00 pm	Rs. 72,28,000.00 Rs. 7,22,800.00 Rs. 50,000.00

For detailed terms and conditions of sale, please refer to the link provided in <https://www.bankofbaroda.in/e-auction.htm> and <https://ibapi.in>
 Date: 11.06.2023
 Place: Dimapur
 Authorised Officer
 Bank of Baroda, Dimapur Branch

Biren Singh-i Manipur raksatsüba ...

(TAPAK 1 NUNGI...)
 Bushisüngdang temi mapa tamajung inyakertem aputsü, parnoki yimten ken o mebenettsü. Anungji lungjemer nokdaksü yimten lenirtem mapa lir, iba tebilemstü bentettsü atema nenok lungjemang.
 Therie-i ashiba agi, taoba ato kilonser, asür P.V. Narasimha Rao-i Dimapur nung lokti tuluka nung jembidang, "Ni nenok nem yimjung magütsütsü. Yimjung ya nenok molung taroktiba nungi indaktsütsüla, ni development agütsütsütsü," ta ashi.



TIR YIMYIM YIMOBILEM (EDITORIAL)

DIMAPUR AMUNGNÜ, AAMI (JUNE) 11, 2023

Tejashi tapu ana

Alima nung tejashi lir, anungji alima nung alir ajak kenkenbo jashitsü. Ajisüaka, tejashi ajuruba ajakji temenen masü saka Tsüngremi mulungbalen jashiba tejashia lir ta 2 Korint 7:10 nung angateter. Iba Laishiba tekong nung ashir, " Kechiyong Tsüngremi mulungba amato jashidaktsüba agi tanaben mesasatsüsa tekümtet asoshi temulung meyipdaksür saka alima tejashibai tasüba adokdaksür." Aji oda, Tsüngremi mulungbalen jashiba o alimai mulungbalen jashiba na tetsüngda aser tepilaji talangka lir. Atangji, tejashi tapu anaprongla agi mulung kanga zürepdaksür. Ajisüaka, tejashi koba agi Tsüngrem bushidaksür aser teti atema tekümtet angur, ibaji Tsüngremi mulungba tejashi saka tejashi koba agi Tsüngrem nungi piladaksür aser tasüba ajurur, ibaji alimai mulungba tejashiji asütsü. Kenken nai mapa tai kar inyakba agi na kanga jashitsüa akok mesüra mapa kar nung tamakok ngur Tsüngrem aser nisung anema jashia bilemtsüa akok, ajisüaka nai na jashitsüsa inyakba agi tekümtet asü tasüba bushir, ibaji nü dak dang keta lir. Alima nung aibelen masür mali, anungji mejashidangera shinga mali, saka na jashiba agi na samatsüsa jashira iba ama tejashijibo Tsüngremi maginer. Asenok ajaki Yihuda Iskariot jashiba otsü meteta lir. Pai par lenir Tsüngrem chir Yisu Khrista taribi sen semeryong ayok. Iba mapang taribi sen semerji alar ka jenjang liasü. Yisu Khrista ayokba sen aser mapa jagi pasasa pa kanga jashia aküm. Ajisüaka, pai par kibur Yisu Khrista bushia orr taidok bushitsü mebiletet aser par medemer Yisu Khrista nütsüng terka toa bushia mao, saka azümeyangdak ka bushia orr pai pasasa soseta asü. Yihuda Iskarioti pa tejashiji Yisu dangi masü puti ungertem dangi oa süngzüksü merang, saka parnoki pa magizük, anungji pa jashiba agi tasüba adokdaksü. Aji oda, Yihuda Iskariot jashiba tejashiji alima tejashi aser temenen mulungba leni aniba tejashi liasü. Iba jagi pa tasüdaki anir ao. Ajisüaka, ano külen Yisu Khrista Yihuda nungertemi pua bener orr temaba putir kidang yua aliba mapang Peteria par kibur Yisu Khrista menangzük. Iba sülen Peter kanga jashia akümnungji tejashi marem pai kanga ajep (Luke 22 : 62). Ajisüaka, Yihuda Iskariot jashiba o Peter jashiba na balala liasü. Peteri par Kibuba menangzükba atema kanga sasa bilem aser taidok nangzük. Idangyongjisa Peter taküm tajungba melenshi aser tamang nung tasü taitba aküm. Peteri jepa taidok meshiba Yisui metet aser Pa shia arur külen Yisu Khristai Pa tsüngdang Peter nem tenangzükba tulu agidaktsü (Yohan 21 :15-17). Yisu tasütsü mapang pa dena pua reshikangshitsü tsübuba agi Yisu Khristaji par tesayur aser Kibur ta menangzük tetaka, kodang Peter taküm melenshi pai pa taküm Yisu Khrista atema asütsü metsübu. Aji oda, pai pa taküm Yisu asoshi bendanga agütsü. Yihuda nungertemi Yisu pua alidang Peteri Pa ken menangzükba dak alaka, iba sülenbo Peter taküm nung Yisu atema inyakdang timtem reshikangshi jenti ajuruaka, pai kodanga Yisu menangzük medoktsü. Ken aibelenba ajanga kanga jashi saka iba tejashi jagi Peter taküm melenshi aser tekümtet angur. Aji oda, asenok kenken kanga jashitsüsa ataloktsüa akok, saka asenok jashiba agi asenok tasüdaki anitsüsa mesüra Tsüngrem tsüngdang nungi pilatsüsa asenoki meinyaktsü tim. Atangji, asenoki aibelendang kanga jashia aiter aser sasar saka tesasaba kija jagi na Tsüngrem tsüngdang taidok mangutsü. Ajisüaka, tanüla temeshi nem nü temenenji jungkai adoka sayudakjang. Tsüngremi na jashiba, na sasaba aser nü menen indangji komaka bilemer, ibaji tanüla nem shidakjang. Aji oda, kodang Tsüngrem tsütsü nungi nai nü temenenji ngudir, idangjiang Tsüngremi aginüba ama na jashitsü. Ibaji dang nü temenen asoshi taidok nangzükba mapang asütsü. Iba tejashi jagi dang Tsüngremi na agizüksü, na moatsütsü aser tejashi agi tepela melentsütsü.

OLEMSABANG

AROGO NÜTSÜNGSÜBA TONGTIPANG SHILEM

- Süpongñüsang Longkümer
Darogapathar Dimapur

Tamasa kü tebilemba tenzüka maotang ocet azünger ajak dangi khrista temeim salem. Asenok tamang nung tashe maitba dak alaka asen kin rongnung ozü kibongpo khristan kibong masü limapur kibong ta shitetsü temulung agi makoktsü südi ta amanger. kechaser Aor balaka khristan temeja aliba kin lir. Khristan kibong nungi asuba kinü nungi metzüsenbabur tashi tsürapor khristan asüba agi ajak khristan chir ta ajarba tang anungji parnok nem khrista metetta kümdaktsütsü asoshi kibong tekülem nung teti Lai zünga tongmelang agi tanga ratetta jembir sarasatem akitsüla, ibaji kibong nung tinyaktsü tsürapor shilem

Khristan kibong ka nung tila tanur aika liaka parnoki ni tzüsentsüla ta mangatet tashi parnok dang khrista osang tajung jangja jangja metetdaksü asoshi ABAMi Sunday school lapoktsüba ya kangasa tajung saka tamalen küm mettsü semer tejaklen yimbazüaka tang sayua aru saka tanü tensa nung tesayurtem züngtetter aliba tem tang asünung tesayuba kanga tajung sayutettba ajitetter. Saka tesayurtemji kibong tekülem akiba aser Laishiba tetenzük nungi tatem tashi azüngba tesayur asü nungang Pa/La asoshia paibalem masütsü südi ta angateter. Tateshitsü ka Mosa I long nungi tzü adokdaksütsü asoshi Tsüngremi melaba ama masü long nungji anapen azükba ajanga teti Aron tena Kanan limai mitettsüsa aküm, Züngtangba 20:11-12 sürnung aikati Mosai Ozüng longbak jakrep aser Aroni Hon aki Nashi yanglur külemdaktsüba agi kanan matong ta jembir, aji tang masü tanü tensa nungpo tenlaki longki tajung nung külemer sürnung aikati süki ta jembir yamaji tilatanur tem dang kümtanga sayutsü Lai aika ali nung tesayurtemi Lai kanga azüngtsüla ta angatetter. Arogoi Tenlaki tajung yangluba ya a tajung saka tongtipang kaji Sunday school ki tulu tajung yanglur class akitsü atema takdang peria yanglutsüla aser mapang peria agütsütsüla ta angatetter kechaser Amongnüji anogo tepiyong asünung Sunday school, Tekülem mapang, Lanur tekülem atema mapang peria adoker. Anungji S S tesayurtem maritepdaktsütsüsa sentong yanglu nung jungti sü ta lemsateptanger. Yisu nütsüngtemi Pa tang Tenlaki tajung yangluba sayu saka Yisui parnok dang ashi tenlaki Long ka manung ka amenloka malitsü ta ashiba tanüa alima aika nung ataloka arudage Mat 24:2 saka Sunday school nungi yanglutsüba tanülatem yipru mopong tesashi aruaka longma nung amendakba mesüka alitsü. Tsüngrem tsüngdang kanga senti pai aji akinür. Kibong ka nung tanur ter liaka ka tanga tsürapor tamang kija agi meküzmüksü saka bei tamang agi tang küzmüksü. Tesayurtemi a nendaka sayua tanurtemji khrista jijia akizükdaktsü nungpo missionary tajung tang nungi ano tajungtiba südisü ta angatetter.

Air asangurtem iba khristar shisatsü nung rotettsür külen lanurtem ministry nung ajemoka aitung tanishirtem anibelem mesasae tenzüktisü ta angateter. Arogoi mission mapa sentong aika inyakbajia tajung saka bei arogo nung teinyaktsü meinyake tezülen ranglokbaji Tsüngremi arogo tang kechi ashitsü? meimchir ya nüji dak alaka tanga lenmang aika malitsü südi, khrista osang tajung agi nüji kümra ochi idakji lir tenük lapokra bei taküm asoshi kechi jangra bilemer aji inyaktsü, arogoi training aika agüjaka bei I jangraba mapa mesüra tajunga tapo ashitsü saka pa/la asoshi jangra maliba mapa süra arogo kanga takoksa asütsü. Koba kintem dangi osang tajung sangokja otir parnok danga nenoki koba inyaknür ta asüngtanga training agütsüyonga ora parnok atema aaji tajungba südisü. Anungji arogo senotsü timtiba Sunday school, aser lanur ministry nung indok tajangzük tuluba adoktsü ta yimlar. Kü tangatetba aser tejangraba tatsü agi lemsatepber Tsüngremi moajang.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir



Israel nung raliwalirtemi kanga sapua semdangba tesemji Masada tenem ya lir. Küm shia raliwalir 750,000 dak temai iba tesem semdangba. Masada ya Judaeen litem lima anüdoklen tsütsü lir aser iba tenem nungi kilometer 20 shi pilar aliba Tasü Tzüyim angur. Masada ya Khristantem aser Yihuda nungertemi temeshi tesem ka ama züngshir. 37 aser 31 BCE tsüngda Herod Chubai tsükchirtem nungi kümzüksü atema iba tenem nung mitsa ana yanglua liasü. Iba tenem nung Yihuda nungertem jenoka liasü aser mezüngbuba Jewish-Roman War tatembanglen 74 CE nung Roman sepaitem iba tesem tonga aruba sülen Yihuda nungeri aika soseta asü. Masada tenem ya Yihuda nungeri nüchiso atema raraba temaitsü ama züngshir.

Myanmar nung Khristan charities senzüsemping nokdang

June 10, 2023: Tawa Myanmar nung Mocha cyclone agi tesem aika kanga mejungi kongshiba sülen International aid, local charities aser Khristan melungtet telok balalai teyari agütsüba maparen inyakner, ajisüaka linük nung sepaitemi item tesem jagi aotsü memelar.

Mocha yipru lendong atalokba sülen United Nations-i lendong agi kongshiba tesemtem nung menatepba tashidak balala poktettsü, ta tekümdangtsü metetdaksüogo.

June 8 nü Rakhine state nung sorkari international melungtet teloktemi amshiba transportation services ajak nokdangogo.

May 14 nü iba cyclone ajanga mopung ghonda ka nung kilometer 250 tashi kera ona kiojen jenti raksatsüba den nisung aika süogo.

Rakhine state nung security & border affairs minister, Colonel Kyaw Thura-i sign asüba shidi ka ajanga transportation services ajak nokdangtsü tetuyuba agütsü.

June 9 nü UN Office for Coordination of Humanitarian Affairs-i sangdong ka ajanga, "Cyclone agi kongshiba Rakhine state nung tensa tamajungba

küma nübur aikati teyari nüngdaker, saka tang teyari agütsüba organisation balala indang travel authorizations [TAs] nokdangba ajanga tensa tamajungba kümogo," ta metetdaksü.

Sepaitemiba iba yipru lendong nung nisung 145 asü ta metetdaksü, ajisüaka National Unity Government (NuG) aser RFA-ibo iba lendong nung nisung 400 shi süogo, ta ashi.

United Nations-i Myanmar kübok Rakhine, Chin, Magwe, Sagaing aser Kachin regions nung iba lendong agi kongshir nisung million 1.6 yaritsü atema dollar sen million 333 agüjang ta mepishiogo.

Rakhine state nung Arogo lenir kati, "Teyari agütsüba maparen nung onoki tetsükdaksü ajurudar, ajisüaka tawa onoki Rakhine state yimtiba, Sittwe nung kibong 1,000 nem teyari agütsüogo," ta metetdaksü.

Rakhine state aser Chin state kübok Paletwa jila ayimjemba Pyay Arogo nungi putirtemi yipru agi kongshiba tesemtem semdanga teyari agütsüba maparen tenzükogo.

Myanmar nung UN Development Program Resident

Representative, Titon Mitra-i, "Timtemba nüburtem yaritsü atema international aid telok balala nem temelaba agütsütsüla. Nüburtemi rongdak teyari nüngdaker," ta metetdaksü.

2008 küm nunga cyclone Nargis agi Irrawaddy Delta mejungi kongshiba sülen international aid telok balalai nüburtem yaritsü merang, saka sepaitemi nokdanga liasü. Iba lendong nungji nisung 130,000 dak tema asü.

May 14 nü 'Mocha' ta ajaba cyclone ajanga Myanmar nung Tenla kitem aser internally displaced persons (IDPs) jenoka aliba shelter camps aika raksaja liasü. Iba yipru ajanga Rakhine state aser Chin state na tamajungba kongshi.

UN Office-i, Chin state nung ki 710 shi raksa, Hakha jila nung ki 153, Falam nung ki 74, Thanglang jila nung ki 93 aser Matupi nung ki 305 raksago, ta metetdaksü.

UN-isa, Kachin state nung Arogoi lapokba shelter homes 42 raksago; item shelter homes nung Internally Displaced Persons (IDPs) jenokdakja liasü, ta metetdaksü.

Muslim nungertemi pongmang nung Yisu anguba sülen Khrista agizüker

June 10, 2023: Assembly of God nungi missionary temi, Muslim nungeri aikati pongmang nung Yisu Khrista anguba sülen Khrista agizükba osang aika lir, ta metetdaksü.

Springfield, Missouri nung aliba Central Assembly nung tongti pastor, James Bradford aser missionary Dick Brogden nati, Muslim nungeri aikati parnoki pongmang nung Yisu anguba sülen Khristan yimsü agizükba lemsateper, ta metetdaksü.

Brogden-i, "Muslim nungeri aikati Yisu agizüker, tesüiba küm

1,400 tsüngda Muslim nungeri Khrista agizükba tatalokba ya tang teimba lir," ta ashi.

"Pongmangtem ajanga jungkai adoktsür aser osangtajung prokba den Khrista agizükba nung shilem agir. Muslim nungeri aikati Islam yimsü magizüker saka Yisu sülen anidakba ajanga parnoki timtem aika ajurutsü ta meteta lir. Ajisüaka pongmang nung Yisu anguba ajanga parnok ajungmesor aser Yisu parnok den teti alitsü ta teimla ngua tesünep angur," ta pai ashi.

Paisa, "Tetsür kati Muslim

yimsü toktsü, la dak tejashi liasü aser Khristantemia la dak melung malem, anungji lai Tsüngrem dang teyari meshia liasü," ta metetdaksü.

"Aonung ka lai pongmang nung sannüker ka ajuru aser sannüker jagi ajok ka amer leper tazüng ka nung jajaba lai angu. Iba sülen Paji indangindanga tetsürla dang jagi oa Pa teka nung aliba amtsük ka sangsangar la nem agüja 'Iba ya agizükang aser Chiang, iba ya Kü temang' ta ashi. Iba sülen lai Khrista agizük," ta paisa metetdaksü.

ANO GO ABEN TSÜNGREM DEN

MIT ADOKBA LENDONG

"Chuba dak tetsübuttsü mitji molusongzü arüba ama lir, shibai pa rasadaktsüdir; pai pei taküm anema temenen" - A. Shin 20:2-3

Mapang ka nung, kibong kümer ita ishika tsüngda nung apu-ani ka Arogo nung sannüker dangi arua tena khuret lemsatep. Tenaprongla mit kanga tema aser kwiben raratepdir, paibenji tena tesashiba aser tejashiba aküm. Oda, sannüker den menteper jembia-jembiabo tena ola tashishi adok. Sannükeri tena süngjemdaktsü saka pai metet tena tejashi aser ain adokbaji liasü. Mapang tatsüka dang lir, iba kibong balatsüsa aküm. Tena mit adokba nung o taku onsara jembiba ajanga kibongji raksa. Ita ishika tejaklen kanga dang meimtepa aliba, dangbo tsükchir kümer senshi.

Asen ain adokba aser mit majungba azüoktsübaji dang masü saka tangara ain matokdaktsütsübaji kanga dang tongtibang. Shirnoki rarabangsenba nung pelar, parnok shisa maka ta Lai O nung ashir.

Meimchir dak ain adokba jakla ya keter masor, saka iba jakla ya kanga lendong tulu ta metetdi. Asen mit azüoker, süngjema dang mangatettep melii timi inyaksangshitsü merangdi.

SARASADEM:

Oba, ain adokba masü tesüngjem jakla teti lidakjang. Amen

South Sudan nung Arogo lenirtemi tongti putir chioktsü mepishir

June 09, 2023: South Sudan langka inyakner; nai linük nung tongti putir ka puer aoba sülen Arogo lenirtemi prangpong amer teloktem dang yimjung ken o jembitsü mepishir.

Hombar (June 5) anepdang prangpong amer telok kati Morobo nung tongti putir, Rev. Aмоса Data Elinoma den pa gari anisang na puer ao.

Sorkar osang ka ajanga, Arogo lenir puer aortemji sorkar anemba telok National Salvation Front (NAS) nungi züngsemtem lir, ta metetdaksü.

Morobo County Commissioner, Moses Soro-i sangdong ka ajanga, putir Aмоса gari ka nung Bazi nungi Morobo-i aoba mapang nung sepai kati pa mena aliba gariji anendaktsü. Putir jagi sepaisangji armed forces nungi lir ta bilema gariji anen saka gari anenli prangpong amer nisung pongui putir den gari anisang naji gari nungi anizük, ta metetdaksü.

Parnoki putir dang, "Putir, nai kodanga mamatoktsüsa onoki

langka inyakner; nai sorkar pusemer, anungji onoki nü meyong gari ali tur remtsütsü," ta ashi.

Putir meyong gariji ita ana tejaklen ang aliba liasü.

Lainya nung putir, Rev. Paul Yugusuk-i, putir Aмоса den gari anisang na indang yangkhubo ngutetogo saka gariji rongdoktsür liasü, ta metetdaksü.

"Yugusuk-i, "Onoki National Salvation Army nung lenirtem dang Tsüngrem tenzükertem aser nüburtem amokmeren masütsü atema sepaitem dang tuyutsü metetdaksür," ta ashi.

"Onoki South Sudan nung prangpong amer telok balala dang yimjung nung alitsü aser ken o jembiba ajanga dang yimtenren tsütsü mangatettep ken o ajak bentettsü mepishir," ta paisa metetdaksü.

South Sudan nung tongti putir, Rev. Justin Badi Arama-ia rara anentsü aser yimjung ken o jembitsü ayongzükogo.

METONGSHITSÜR :

Taoba anogo asem tashi iba tapak nung Ao Oshi Angazükdak ojang agütsüba nung Süngrangtsü zülumen meshitaki agütsüba puteta yamai metongshitsür :

Rangma

(v) **Süngrangtsü** amshia inyakba mapa adem (completed sawing work)

* Arogo nunger tenla ki asütsüba süng ajak tanü rangma.

Rangpang

(n) tu talang ser techira aketba tzütok, atsüng (reed)

* Rangpang ya ayongküm nung meyrir.

Rangrangtur

(adj) tekara aser pungpapungpar (light and fast)

* Moababo tangar ama masü kanga rangrangtur.

Rangsa

(v) nok mesüra **süngrangtsü** agi aika kümdaktsü (cut into pieces)

* **Süngratsü** agi au pongdang rangsa aser yangji ango rangsar asen.

Rangset

(v) nok mesüra **süngrangtsü** agi ranga südaktsü (death by sawing or cutting)

* Oboula nem an ka rangseta tetsü jemdaktsü.

Rangshia

(v) tenük tuluka saker longshia repring (stare at with rolling eyes)

* Kü tesayuri kü dak rangshia-rangshia repringer ao.

AO OSHI ANGAZÜKDAK: TANÜ ANGAZÜKTSÜBA OJANG



Rangtak

(v) tenük meremshii repring (stare at without blinking)

* Onoki parnok tsütsü khien **rangtak** aser meyipa ao.

Rangtok

(v) wazüka mesüra rangteta endok (cut away)

* Kimalen süng juzüka alua aliba ni **rangtok**.

OLONG PAITEP # 6542

1		2				3		4		5
				6						
		7		8						
9						10			11	12
				13		14	15			
16						17		18		
				19		20				
21		22								23
24										

TIPIEN

- 1. Saku - (4)
- 6. Songjen - (7)
- 7. Mali/Tazung - (4)
- 9. Tasen apok - (6)
- 11. Songtem - (3)
- 13. Ata liasü - (5)
- 16. Tzunglu den külemi tsüker - (3)
- 17. Aso tila - (6)
- 20. Tashi maküm - (4)
- 24. Tenung kasa jatapba - (7)
- 25. Ki yangluba oset - (4)

LANGTSÜNGLEN

- 1. Taksep - (3)
- 2. Langtem - (5)
- 3. O tamendaktak - (4)
- 4. Nütsü tebuba - (3)
- 5. Anungdang tesangwa - (3)
- 6. Apitet - (5)
- 7. Yagi jungdaktsür - (4)
- 8. Anogo semer ka - (3)
- 10. --- tatsü - (3)
- 12. Tebur kidong aser zünga kasa tsüngda jatapba - (4)
- 14. Pela agizükba tapu ka - (5)
- 15. Tenung atet - (3)
- 18. Mejanga onü - (5)
- 19. Talak techira - (4)
- 21. Maneni - (3)
- 22. Nübo teyi - (3)
- 23. Meshi - (3)

OLONG PAITEP # 6541 TELANGZÜBA

TIPIEN :

- 2. Asangwa, 4. Pasa, 6. Temopu, 7. Sayu, 8. Sang, 9. Ibai, 10. Juli, 12. Temeja, 13. Aisü, 14. Pongsen.

LANGTSÜNGLEN :

- 1. Manga, 3. Apong, 5. Angu, 6. Techira, 8. Shiotep, 12. Jara, 13. Lemsa.

Meghalaya: FKJGP-i tashishiba ka agütsü

Shillong, Aami/June 10 (Agencies): Meghalaya nung Federation of Khasi Jaintia and Garo People (FKJGP) Garo Hills zone-i, tawa bus service operator temi kaketshirtem school tembangba sülen parnok idang bus nung memendaktsüba dak sendakba nung Tura Deputy Commissioner, Jagdish Chelani nem tashishiba ka agütsüogo.

Video ka koba social media nung ayimsünga prokshio go iba video nung tatalokba indang nguogo aser iba ajanga lenla ajak nungi nüburtemi tebilemtsü ka bilemba lemsatepogo.

Iba sülen FKJGP-i takaratiba nung jenjang agia bus achaayangba travelling agency nung inyakerem den tongtepratepa iba ken o ashishio go.

Bushisüngdangba mapang, tawa Tura traffic police-i gari

senzüsenpong dak sendakba nung ozüng tesashi benokba ajanga kaketshirtem bus nung memendaktsütsüsa kümogo, ta FKJGP lenirtem nem metetdaktsü.

Traffic police-i bus nung nokdaker senzürtem atema takhang agia arudar. Iba ozüng benokba sülen tashi mangartem dang senchi sen 2000 chia arudar.

Maneni parnokisa, kaketshirtem timba ticket mali-i nokdaker dang senzür, koba parnok atema inyakyim ka kümogo, ta ashi.

Takhang agiba ajanga bus agencies aser kiburtemi takang nungi jenbotsü atema parnok indang bus nung kaketshirtem manioki arudar.

Iba tatalokba dak sendakba nung FKJGP-i kanga süoki ia bilemba lemsatepogo aser ashiba agi, kaketshirtem

senzüsenpongtsü atema temelaba magütsüba ajanga parnok kaketshisatsü bushiba nung tetsükdaktsü adoktsü.

Kaketshirtem school nungi kidangi oli oratsü atema public transportation dak metaloker alir aser parnok nem senzüsenpong nung tenokdangba agütsüba ya tetsükdaktsü tulu ka lir.

Federation-i, Tura Deputy Commissioner Jagdish Chelani dang iba ken o ya kanga junga bushisüngdangtsü aser kaketshirtem nem kecha tetsükdaktsü magütsütsü atema jenjang tapet agitsü mepeshia metetdaktsüogo.

Parnoki, ketdangsurtem dang bus operator aser traffic police naprongla den tongtepratepa kaketshirtem densema passenger ajak atema lenmang ka lapoktsütsü mepeshia metetdaktsüogo.

Yimtsüngtem nung chiyongtsü, mapa agi anünger: CPIM

Agartala, Aami/June 10 (Agencies): Communist Party of India-Marxist (CPIM)-i, Tripura kübok yimdak yimtsüngtem nung aliba nüburtem chiyongtsü agi anüngba, mapa manguba aser senotsü agi kanga anüngba atema süoki ia bilemba lemsatepogo.

Tripura Tribal Areas Autonomous District Council indang taoba Chief Executive Member Radhacharan Debbarma-i ashiba agi, taoba Chief Minister Manik Sarkar-i anir CPIM züngsememi tawa Dhalai district kübok tesem balala semdanga yimdaklirtem libaliro jenjang asadanga liasü.

June 7 nü Thalcherra tesem semdangba mapang lenirtemi

local tem den sensak asem aser lenmang jenjang kanga mejungi aliba indang jangja aküm. Iba tesem nung aliba nüburtem parnok anogoshia libaliro nung timtem tekangshi aika ajangshidar.

Parnok nem Mahatma Gandhi National Rural Employment Guarantee Act (MNREGA) kübok mapa magütsür aser tanga sorkar sentongtema metenzükteti tamakok nung lir. Kasa mapang nung yimdaklirtem nem parnok taa magütsüi arudar.

Anogoshi liyonga aotsü atema karibo ozüng alema inyaksangshia Bangladeshi nungi "Gandhaki" bendener. Parnok asoshi ano sen aatsüba

lenmang kaji kioktsü ayokba ya liasü, ajisüaka Bharatiya Janata Party (BJP) aser TIPRA Motha züngsemtem tsüngda mangatettep aliba ajanga iba inyakyim nunga kongshio go.

Ibayongji yimdaklirtem rongsen aser chiyongtsü agi kanga anünger ta CPIM lenirtemi ashi.

Maneni Debbarma-i, item nüburtem sen aazüktsü atema tanga lenmang kecha mali aser ibayongji parnok kanga terata nung lir, ta ashi.

CPIM lenirtemisa, parnoki iba ken o ya BJP sorkar nem metetdaktsütsü tebilemba aliba lemsatepba den ken o tangsa tang bentettsü atema jenjang agitsü asoshi akhangtsü telemtetba agiogo, ta ashi.

Assam: Kaketshir ka asüba ken o nung contractor ka puogo

Guwahati, Aami/June 10 (Agencies): Guwahati kübok Ganeshguri tesem nung tia maka tatalokba ka nung tetsür chanu ka asüba dak sendakba nung lenmang tezülen ongen atuba dak sendaka aliba contractor ka puogo.

Hokolbarnü AK Construction Company indang director puogo.

Guwahati Metropolitan Drinking Water and Sewerage Board-i FIR benokba sülen iba nisungba ya pua liasü. FIR nung compary-i mapa shitak minyakba indang shisema lir.

Hokolbar aonung Assam police-i AK Construction Company indang contractor Parijat Saikia Biswanath district kübok Soteea tesem nungi apu.

Saikia Honibar anpedang Dispur police station-i anirogo aser temzüng ozü kübok maneni jenjangtem agitsü.

Iba construction company director B Balaji-a kasa anogo yimti kübok Narengi tesem nung company indang office nungi puogo.

AK Construction Company

ya M Venkateswara Rao meyong lir aser parnok nem Guwahati kübok tesem 12 nung water supply project ka inyaktüsü atema contract agüja liasü.

Ajisüaka Jal Board-i, company inyakyim aika meshidakba repringtetogo aser parnoki mapa majetba aser guideline sülen shitak manidakba ajanga tebilemtsüka-bilemer. Iba den bendenloksema AK Construction Company-i Transport Department aser Public Works Department nungi temelaba shitak magi.

Brehostibarnü Ganeshguri nung lendong atalokba nung kaketshir ka taküm samaogo aser iba ajanga Guwahati Metropolitan Drinking Water and Sewerage Board-i AK Construction Company anema ken o benoktsüsa aküm.

Bushisüngdangba sülen company yagi parnok mapa tembangba sülen parnoki atuba ongen junga nembanga metoktsüba ngutetogo.

AK Construction Company nema JICA-i teyari agütsüba water supply project inyaktüsü

nongloktsü, ajisüaka iba company inyakyim dak sendakba nung tashishitsü keta aliba ngutetogo.

Brehostibarnü lendong nung asüla ya Guwahati kübok Hatigaon tesem nung la adianu den scooter ka nung school-i oya aliba mapang iba lendong ataloka liasü.

Lendong atalokba sülen aikati school bus driver dak tai tonglokja liasü. Aikati iba school bus ya tesülen nungi kanga kar arur scooter dak tsükoktsü aser iba ajanga aiür chanula ya asü ta bilemba liasü.

Ajisüaka CCTV footage ajanga noksa tanga ka sayuogo. CCTV footage ajanga bus ya kanga kara senzüa maliasü ta sayuogo.

Bus ya shidak dang oya liasü aser lane-a memelenshi mesüra bus yagi scooter dak tesülen nungi matsük.

Shitakbabo scooter yagi school bus ya tabelen nungi overtake asütsü merang aser overtake asüba mapang lenmang nung ongen aliba mongui asongoka ai aser alanga bus agi menünga asü.

Colombia tayimtsü tsükoker anogo 40 sülen tanur pezü ngutet



Colombia kübok Amazon min nung tayimtsü ka tsükoker anogo 40 sülen iba tayimtsü nung mena aliba tanur pezü kumzükogo. Iba tayimtsü tsükokba lendong nung pilot ana aser tanurtem tetsü asü aser tanur pezü ya takum jenbua liasü. Tanur pezü ya anogo 40 tashi arem min nung parnok kisung nemzua liasü.

Bogota, Aami/June 10 (Agencies): Tayimtsü ka tsükokba mapang tasü nungi kumzükba tanur pezü Colombia kübok Amazon min nung hopta aika mung kumzük.

Colombia tiri ashiba agi, adianu pezü, ka arishi küm 13, ka arishi küm toku, ka pezü aser ka arishi küm ka takum ngutetba ya linük asoshi tepela lir.

Parok mena aliba tayimtsü tilaka May 1 nü arem min nung tsükokdang tanurtem tetsü aser pilot ana asü.

Samar aliba tanurtem dak rangloker rescue operation tenzük, aser iba mapang sepai aser anasa aliba nisungtemia yaritepa liasü.

Tir Gustavo Petro-i ashiba agi, parnok ngutetba ya "magical day" liasü. "Parnok kisung liasü, takum alitsü asoshi parnoki tatishitsü tajung yangluogo, koba puti otsü nung alitsü."

Tanurtem ya Huitoto indigenous telok nungi lir. Anogo 40 samar bushiba adianutem mitkar aser lisopuri anepaluba noksa tem Petro-i lemsatepa liasü.

Tekumzük kati tanurtem rongnung tilatiba tepang anasa bottle ka amer liasü, aser kati ano tanur ka nem marok nungi spoon agi tsülema liasü.

Colombia indang ministry of

defence ajanga video ka prokshiba nung tanurtem ya ammag nung arem min nungi helicopter ka nung aniketa liasü. Parnok ya linük yimtiba, Bogota bushia bener ao aser yangji ambulance temi temang anepalutsü asoshi mozü kidangi anir ao.

Tanurtem tetsü (grandmother) Fatima Valencia-i ashiba agi, "Ni kanga pelar, aser alima tetsü danga pelar, parnok chiokogo."

Lai ashiba agi, tetsü mapai aodang adianu pezü rongnung tantsüla tenu par asem ya anepalua liasü, aser ibaji ajanga parnok arem nung takum litet.

"Lai parnok nem am aser alishi (cassava) agi yangluba amtsük agütsü, arem nung aliba süngjang achitsü junger ta metetba ajak agütsü," ta Valencia-i ashi.

Tanurtem aser parnok tetsü mena aliba Cessna 206 aircraft ya Amazonas province nung aliba Araracuara nungi San José del Guaviare bushia aodang engine nung timtem ajurua liasü.

Nisung tain asem indang tasü mang ya army temi tayimtsü tsükokdak ngutet saka tanurtem ya iba tesem nungi ainshia teyari bushia arem min nung nemzua liasü.

Iba sülen parnok bushiba

maparen tenzük aser tanur tzi ajemba bottle, scissor ana, hair tie aser süki ka densema rescuer temi May ita tanurtemi yutsüba oset kar nguteta liasü.

Iba mapang tsügnep tila kar ngutet aser ibaji ajanga tanurtem arem nung takum lir ta amang, kong jaguars, per aser danga shi achiba shiruru alir.

Tanurtemi süngjanglijang aser arem nung takum kumzuka alitsü meteta aliba ajanga parnok takum alitsü akok, ta tanurtem indang yimtsür-yimer temi imla liasü.

Lisopur-ia parnok bushiba nung aden aser tetsü (grandmother) jembiba o helicopter tem nungi sangdonga liasü, koba Huitoto oshi nung record süa liasü aser parnok senzusempongba anentsü ajungshia liasü.

Parnok ngutetba sülen parnok tebou Fidencio Valencia-i ketdangsürtem dang tanurtem ya Villavicencio nung kinungertem anasahi anir arutsü ayongzük, koba Bogota nungi kilometre 130 shi pilar lir.

"Ni tematiba ketdangsür tir dang asüngdang, nü nem timtem agütsüba asoshi sasar, saka ibai küm temeden aser kü mapa, kü zü, ibai ozü kibong. Ni tanurtem yangi Villavicencio nung ajuruner," ta pai ashi.

Pak rongsenketzung mejungi liaka defence atema sen billion \$6 dak tema lezmüksü

Islamabad, Aami/June 10 (Agencies): Taruba küm Pakistan sorkari defence nung Pakistan nung sen trillion 1.804 indoktsü, ta osang ajanga ashi. Ibai tang lezmükja aliba dang shilem 13 agi timba lir, ta osang ajanga ashi.

Defence budget ya GDP shilem 1.7 jungnüa lir aser taruba küm atema sorkari senotsü indoktsü sentong yanglua aliba shilem 12.5 lir, ta ashi.

Alima nung sen aputsüba tentet, International Monetary Fund (IMF) ajanga sorkar dang defence tsütsü sen indokba ajemtsü mesüra revenue tali atema consumer goods nung GST sholem 25 atutsü February ita shia liasü.

IMF-i akhangba ama Pakistan sorkari consumer goods ter dak tema nung GST shilem 25 meshi saka defence tsütsü sen indokba majemtsü.

Taoba küm Pakistan-i defence atema Pakistan nung sen (PKR) trillion 1.57 lezmüksü saka tesülen melenshia PKR 1.59 trillion kumdaktsü.

Iba budget nungi Pakistan army nem PKR sen billion 825 lezmüksütsü, iba sülen linük indang air force nem PKR 369 billion aser navy nem billion 189 agütsütsü. Sorkari retired military ketdangsür indang pension shilem 26 kumtsü.

Osang ajanga ashiba agi mitkar indang pension ya defence budget nung maden aser tongtipang nuclear aesenals aser defence dak sendakba osettsüset bendang lima nungi aliba aser tongtipang sentongtem budget nung lemsaa mali.

Pakistan indang defence budget lezmüksüba nung defence administration, employee expenses, operating expenses, physical assets, aser

civil works densema lir.

Defence budget nung defence administration atema sen PKR billion 5.4, employee costs atema billion 705, operating expenses atema billion 442, physical assets atema sen billion 461 aser civil works atema billion 195 lezmükja lir.

Sorkari defence budget aser ano sorkar mapa inyaker ajak indang itasen aser pension timba kumtsüba ya election mechi 'populist' mera ka ama ajiteter.

"Taküm tax tasen memeshir, aser sorkari akok tashi anisüngzük agütsütsü merang," ta Pakistan finance minister Ishaq Dar-i Hokulbarnü budget mebenokdang ashi.

Iba budget yagi IMF nungi teyari agütsüba nung yarisemtsü Dar aser Ato Kilonser Shehbaz Sharif nung teimla lir.

Pakistan sorkari iba budget ya IMF-i imlaba ama lir ta amanger.

MOLUNGNEN O



1952 – 3rd June, 2023

Onoki teti meima aliba kinungtsü aser ojala **O. NUKSHILILA AIER** (Molungkimong) akumulli wadang tembanger iba lima toktsür aoba mapang, arogo, yimten, telok balala, kija aser kibongtem shirnokisa pei akokba yari nübu, rongsen, shisatsü aser sarasadem agi onok yariogo, nenok ajak dang kangasa pelaba lemsateper. Nenok temeim mapa tajung asoshi onoki Tsüngrem tenung asanger.

Tulusang Tsüngremi nenok ajak talupusa moajangma ta ozü sarasadem.

~Temeim Kinungbo, Jalatem aser Kinungertem

MENUNGRA BILEMTETER

Bungmang dang ka südaksünüli ta nai onok doktsür oar anogo shia na menungra bilema tanü küm ka rentetogo.

Na Sempet yimya awashi tajungtem aser akumulli mapang aser mapatem bilemteta tanü anogo kinunger ajaki Tsüngrem nem tenungsang aguja sarasadema amunger.



Asür KILANGCHUBA MOLLIER (Sungratsu) Asü 11/06/2022

~Temeim Kinungtsü, Jala-Jabaso aser Kinungertem.

PELABA LEMSATEPER

Asür, **Odikumzük (Salulamang)** den akumulli wadang tembangba anogo temeimer ana aser talang nungi shirnokisa ozü asüko mangyim mapang nung nübo, rongsen, shisatsü, sarasadem aser aria bilemba lemsateba ajanga ozü mangyim, jashi, khuret tepungbaba kümdaktsü, nenok ajak dang kangasa pelaba lemsateper.

Nenok ajak Tsüngremi maneni moajang ta ozü tamang sarasadem.

~ Temeim Kinungtsü, Jabaso, Kinungertem.



28/02/1968 - 05/06/2023

MOLUNGNEN O



Asür NUNSHIKALA OZÜKÜM

Asoba 01:08:1930

Asüba 30:05:2023

Onoki teti meima aliba ojala asür Nungshikala Ozüküm (Waromung) la shirangba mapang nungi tasüba anogo tashi, kija, kibong aser lokti tentet balala shirnokisa sarasadem, nübo, shisatsü aser rongsen agi yaritepogo, nenok ajak dang kangasa pelaba lemsateper.

Tulusang Tsüngremi nenok ajak moajangma ta ozü sarasadem.

~ Temeim Chirnurtem, semchirtem, kinunger aser anükapangtem.

Ravindra Jadeja-i otsü tasen ka yangluogo



Ravindra Jadeja

Aami/June 10, 2023 (Agencies): Test cricket asaya nung India nunger rongnungi Bishan Singh Bedi-i tajungtiba asaya wicket timtiba agir aliba Hokolbarnü Ravindra Jadeja-i

ajateta otsü tasen ka yangluogo. Tang India aser Australia na World Test Championship final asaya aliba tasembuba anogo Jadeja-i mezügbuba innings nung century yangluba asayar

Aami/June 10, 2023 (Agencies): Austria nunger international asayar Konrad Laimer, RB Leipzig nungi free transfer ama Bayern Munich nung denogo, ta Bayern-i Hokolbarnü sangdong ka ajanga metetdaksü.

Midfielder asayar ya Bayern Munich nungi 2027 küm tashi asayatsü.

RB Leipzig aser Laimer na tenanzüktepba yanglur aliba summer nung tembanger aser pa nem January 1 nü nungi tenzuka tanga club den sensaksemtsü asoshi temelaba agütsür liasü.

Laimer, Leipzig nungi asaya 190 nung asayaogo aser iba

mapang pai goal 15 idaktsü aser assist 19 süja liasü. Pai Leipzig nungi asayaba mapang 2022 aser 2023 küm German Cup kokogo.

Austria nunger asayar ya joko ita aika Munich-i aotsü atema sendaktepa aruogo aser pa ya Bayern manager Julian Nagelsmann-i kanga saklokba asayar ka liasü, shiba Leipzig team coach liasü.

Summer transfer window nung Bayern-i tang mezügbuba Laimer den tenanzüktepba yangluogo. May ita sporting director Hasan Salihamidzic mapa nungi anentsüba sülen tang mezügbuba asayar tongtibang

ana; Steve Smith aser Travis Head na out süja iba otsü tasen yanglua liasü.

Jadeja-i Test asaya 65 nung wicket 267 agiogo. Pa indang economy rate 2.44 aser average 24.25 lir. Kasa mapang nung Bishan Singh Bedi-i asaya 67 nung wicket 266 agir liasü.

Arshi küm 33 tain all-rounder ya Tests asaya nung left arm-spinner tajungtibatem rongnung pezübuba nung lir. Pa England nunger Derek Underwood (297 wickets, 86 matches), Daniel Vettori (362,113 matches), aser Sri Lanka nunger Rangana Herath (433, 93 matches) nunger sülen pezübuba nung lir.

Jadeja-i 2023 küm Test asaya nung kanga junga asaya arudar. Pai asaya pongu nung run 183 yanglur lir. Pai taküm half century ka dang yanglua lir.

Iba den bendenloksema pai taküm wicket 25 agir lir aser pa indang average 19.84 aser economy rate 2.63 lir. Pai innings ka nung run 42 agütsü wicket 7 agiba ya taküm asoshi tang tashi nung figure tajungtiba asütsü.

Bayern Munich-i RB Leipzig nungi Konrad Laimer alizükogo

Aami/June 10, 2023 (Agencies): Austria nunger international asayar Konrad Laimer, RB Leipzig nungi free transfer ama Bayern Munich nung denogo, ta Bayern-i Hokolbarnü sangdong ka ajanga metetdaksü.

Midfielder asayar ya Bayern Munich nungi 2027 küm tashi asayatsü.

RB Leipzig aser Laimer na tenanzüktepba yanglur aliba summer nung tembanger aser pa nem January 1 nü nungi tenzuka tanga club den sensaksemtsü asoshi temelaba agütsür liasü.

Laimer, Leipzig nungi asaya 190 nung asayaogo aser iba

mapang pai goal 15 idaktsü aser assist 19 süja liasü. Pai Leipzig nungi asayaba mapang 2022 aser 2023 küm German Cup kokogo.

Austria nunger asayar ya joko ita aika Munich-i aotsü atema sendaktepa aruogo aser pa ya Bayern manager Julian Nagelsmann-i kanga saklokba asayar ka liasü, shiba Leipzig team coach liasü.

Summer transfer window nung Bayern-i tang mezügbuba Laimer den tenanzüktepba yangluogo. May ita sporting director Hasan Salihamidzic mapa nungi anentsüba sülen tang mezügbuba asayar tongtibang

ka club-i anisemogo.

Taoba season Bayern-i tatemangbuba anogo nung goal difference agi Borussia Dortmund ajateta league title benogo. Parnoki league ya 11benbuba atonga kokogo.

Laimer ya Bayern nung Joshua Kimmich aser Leon Goretzka aser külem Austria nunger Marcel Sabitzer nunger den midfield nung asayatsü.

Sabitzer shiba Manchester United-i loan nung oa lir pa season tanabuba shilem asayaba sülen Bayern-i meyipa arutsü. Pa-a RB Leipzig nungi Munich nung adenba asayar ka lir.

Nandhakumar Sekar küm 3 atema East Bengal nung denogo



Nandhakumar Sekar

Aami/June 10, 2023 (Agencies): East Bengal-i Honibarnü sangdong ka ajanga India nunger midfielder Nandhakumar Sekar den küm asem atema tenanzüktepba yangluba sangdongogo.

Taoba season Odisha FC-i mezügbuba Super Cup akokba nung Nandha-i tongtibang shilem agia liasü. Pa Odisha FC pur mezügbuba ISL playoff atema qualify asüba aser AFC Cup nung asayatsü atema jenjang nguteta asayaba team nung tongtibang asayar ka liasü.

"Linük nung asayatem ajaki East Bengal amala club tulu nungi asayaner. Ni tang tajangshiba tasen ajangshia onüba mapang ka lir," ta arishi küm 27 tain asayar yagi ashi.

East Bengal head coach Carles Cuadrat-i, team nung Nandha bendenloksema ajanga team attacking nung tashi taitba akümtsü ta amanger.

"Nandhakumar team nung aniokba atema pelar. Pa kümtem tsüngda kanga renloka aruogo aser pa indang career nung tang tajungtiba mapang ka lir," ta

Spain nunger coach yagi ashi.

"Pai taoba season ISL aser Super Cup naprongla nung kanga junga asayaogo aser Odisha-i Super Cup akokba nung tongtibang shilem agiogo. Pai team attacking asaya nung teyari tulu agütsütsü ta amanger," ta Cuadrat-isa shisem.

Nandha taoba season Odisha team asaya shilem 95 nung asayaogo aser pai goal 11 idakja liasü.

Pa ya ISL 2022-23 nung India nunger asayatem rongnungi goal timtiba indaktsüba asayar tasembuba liasü aser Super Cup 2023 nung India nunger rongnungi pai goal timba idaktsü.

Pai taoba season ISL nung asaya 20 nung goal trok idaktsü aser assist ka süja liasü.

Nandha-i kanga junga asayaba sülen pa tang asaya aliba Intercontinental Cup aser taruba SAFF Championship atema senior national team nung züngoksemogo.

Ken o bentetba sülenang Asian Games nung shilem agitsü: Sakshi



Sakshi Malik

New Delhi, Aami/June 10 (Agencies): Wrestler tem ken o bentettsü atema sensaksema mapang ka nung Sakshi Malik-i Honibarnü ashiba agi, ken o ajunga mebentetra parnok Asian Games nung shilem magitsü.

Sonipat nung osangbenertem den sensaksema mapang Malik-i, wrestler tem anogoshia tekolok shisatsü mesüngjemeti aliba ya shingaia mangateter ta ashi.

Arishi küm 30 tain asayar ya wrestler tem taruba jenjang agitsü atema telemtetba ka agitsü asoshi Sonipat nung Mahapanchayat ayongzükba nung shilem agitsü atema arua liasü. Wrestler temi sexual harassment ken o dak sendakba nung Wrestling Federation of India (WFI) tir Brij Bhushan Sharan Singh aputsü atema khanga arudar.

"Ken o ajak bentetba sülenang onok Asian Games nung shilem agitsü. Onok anogoshia tekolok shisatsü mesüngjemeti aliba ya nenoki mangatettsü," ta Sakshi-i ashi.

Asiad atema trails iba ita ishika tsüngda agitsü lia Sakshi-

i iba olen lemsatepogo. Longkak aitba nung shilem agirtem densema wrestler tem ajak Asian Games atema India team nung züngoksemtsü asoshi trials nung tokteptsü. Asian Games ta taküm Hangzhou, China nung September 23 nungi October 8 tashi asayatsü.

Bodhbarnü Sakshi den külemi Bajrang Punia aser tanga wrestler temi Union Sports Minister Anuarag Thakur den par kidang ajurutepa liasü aser ashiba agi police-i bushisüngdanga aliba tembangdaksütsü atema sorkari June 15 nü tashi mapang meshiogo

"Sorkari police-i bushisüngdanga aliba tembangdaksütsü atema June 15 nü tashi mapang meshiogo. Wrestling dak sendakba nung onok takhangbatem timba parnoki agizükogo. Tang onoki item onüktem ya farmers' unions, women's unions, seniors tem aser khap panchayats matsüngdang toktsütsü. Onoki June 15 nü tashi longkak maiti atatsü saka WFI tekolakba anema maneni nokdaksü," ta Sakshi-i IANS dang ashi.



Morning Football Association (MFA)-i ayongzuka June 9 nü Indira Gandhi Stadium Kohima nung merekmeju sentong ka agiogo. Iba sentong ya MPL managing team-i anir inyak aser tang MPL nung shilem agia aliba team 10 nungi züngsemtemi shilem agia liasü.

BILEMDANGANG

"Tenüngsang agütsütsü asoshi nongnanga teli."